

dicatus est, plurimis Metropolitanis adstantibus, cum huic Metropolita fungens munere praefuerit Maximinus Treuerensis Episcopus. Et quis non fatebitur urbem illam, quae ex Siluestri P. ad Agracium Treuerensem verbis, prima post Romam erat, saltem Metropolim Ecclesiasticam fuisse? Imo dicam Treuerensem Episcopum non tantum Metropolitam tunc fuisse, sed etiam Primatē totius Belgicae & Germaniae Cis-Rhenanae, quae huic ut unico Metropolitanano parebat, nec certē quispiam alius apud ipsas his temporibus legitur. Huius veritatis testis fidelissimus est Gregorius VII. * dū ad Manassēm Rhemensē Episcopum scribens, ait: [Rhemensis cui praesides Ecclesia quodam tempore Primati subiacebat, & ei ut magistro post Romanum Pontificē obediuit.] Cui enim alteri Primati, quam Treuerensi Rhemensis Ecclesia subiacerit, sanē dici non potest. Id autem esse satis indicauit Mappinius ^b Rhemensis, qui, cum à Theodobaldo rege indicta fuisset Synodus apud Tullum circa excommunicatos à Nicetio Treuerensi, ipsique adesse non potuissent, huic Nicetio absentiam suam per epistolam excusauit, ut Superiori suo: scripsitque absurdum esse, ut à se in communionem reciperentur, qui ab ipso Nicetio secundum seriem Canonum abdicati erant. Numquam enim hanc scripsisset Mappinius, nisi super eū Nicetius Primas constitutus fuisset. Istud adeo certum est de saeculis Constantino posterioribus, ut nequidem in dubium reuocari possit. Sed quod ante illum Treuerensis Episcopus Metropolita fuerit totius Belgicae, dum etiam duas Germanicas complectebatur, ratione non parum euidenti probabo. Metropolitana dignitas ei sedi proculdubio tunc tributa est hacce in prouincia, cui Metropoles, in ea postea institutae, parebant ut Suffraganae. Sic enim Lugdunum Metropolis antiqua censetur totius Lugdunensis, quia Metropoles in ipsa post Constantinum erectae huic antea subiiciebantur. Sic Bituricarum ciuitas antiqua Metropolis secundae & tertiae Aquitanicae creditur, quia Burdegala & Elusa ante eundem Imperatorem eius Suffraganae erant. Idemque de Arelato dicendum est circa Narbonensem antiquam: easque omnes idcirco postea Primatiales fuisse. Nec alia equidem ratione Episcopi Primates habiti sunt, quā quod primae prouinciæ, quae alijs ortū dedit, eiusque Metropoli praefuerunt. At quis nescit, Treueris Metropolis primae Belgicae, ceteras Metropoles, quae in tota Belgica post eam institutae & ab ipsa auulsae sunt, prius Suffraganeas, merasque sedes Episcopales fuisse? Patet de Moguntia & Colonia, quae nonnisi Carolo magno imperante Metropoles Ecclesiasticae factae sunt, & antea sedes tantum Episcopales habuere. Nec aliter de Rhemorum ciuitate censendum arbitror, quae Metropolis facta, adhuc, ut diximus, huic subiecta mansit. Quare necessario fatendum est Treuerensem Episcopum ante Constantinū Metropolitam fuisse totius Belgicae latē sumptae, Treuerimq; eiusdem Metropolitim. Gelasium ^c Papam non ignoro scribere Treuerensem Episcopum ex hoc nihil, supra mensuram sibi antiquitus deputatā, quidquam suae dignitati adiecisse, quod apud Treueros aliquando steterit Imperator. Sed cum nullas ciuitates Patriarchalem dignitatem ex hoc sibi vēdicare posse, quod aliquando sedes Imperatorum fuerint, tantū intendat aduersus Constantinopolitanum Episcopum, nullatenus eius verba Treuerensi Primatui obstare possunt. Lugdunū Metropolis dicitur apud Ptolemæū, ^d fuitq; sanē Galliae Lugdunensis. Paulò supra Viennā est, inquit Strabo, ^e ubi Arar & Rodanus confluunt: dicitur Stephano ^f Lugduna, Sidonio Apollinari ^g Rodanusia, & alijs Araria,

^a Greg. 7. l. 6. ep. 1.

^b Mappinius ep. ad Nicet. Treueren.

^c Gelas. P. ep. 1. ad Episcop. Dardan.

XI.
LVGDVNVM METROPOLIS ET SEDES PRIMATIS TOTIVS LVGDVNENSIS.

^d Ptol. l. 1. c. 8.
^e Strabo lib. 4.
^f Stephanus de urbibus
^g Sidon. Apoll. epist. 5. lib. 1.